

Konstabel lulusan PhD bawa perubahan

APABILA saya terbaca berita mengenai lima berkelulusan Sarjana dan Doktor Falsafah (PhD) sanggup menjadi rekrut konstabel Polis Diraja Malaysia (PDRM), banyak perkara bermain di fikiran saya.

Pertama, kesanggupan mereka bekerja dengan pangkat biasa. Kedua, minat mereka yang luar biasa. Ketiga, kesediaan mereka menerima arahan daripada individu berkelulusan lebih rendah daripada mereka sendiri dan keempat, mereka tidak mempersoalkan gaji yang diterima. Apakah yang boleh dipelajari daripada sikap mereka ini?

Kes ini sebenarnya boleh memberi banyak moral untuk direnungi bersama bagi mereka yang mahu berfikir. Antara moral utama yang boleh difikirkan adalah sikap sesetengah anak muda yang sanggup menganggur walaupun peluang pekerjaan di negara ini masih luas.

Berbanding di negara jiran, rakyatnya berpusu-pusu cuba mencari lombong emas di negara ini, sebaliknya, rakyat negara ini lebih leka dengan imaginasi sendiri ibarat Mat Jenin yang berangan-angan tanpa usaha.

Tidakkah mereka sedar dengan menganggur boleh menyebabkan negara dibanjiri pendatang asing yang memberi pelbagai impak kepada negara?

Laporan Parlimen Ke-11 sendiri membincangkan dengan serius mengenai gejala pekerja asing yang semakin hari semakin meningkat di negara ini. Pada masa yang sama, bilangan pengangguran juga dikatakan mencecah 60,000 orang, merangkumi pelbagai tingkat kelulusan. Pada peringkat ijazah pertama saja, jumlah penganggur dikatakan mencapai bilangan 20,000 orang.

Menurut laporan ini, beberapa faktor sudah dikenal pasti sebagai penyumbang kepada masalah berkenaan. Antaranya, pekerja tempatan mempunyai sikap memilih kerja yang lebih cenderung memilih pekerjaan kolar putih serta yang bersesuaian dengan kelayakan mereka.

Kedua, tawaran gaji yang rendah menyebabkan pekerja tempatan tidak begitu berminat untuk bekerja di sektor berkenaan.

Khusus kepada perbincangan ini,

keputusan 'konstabel luar biasa' ini nampaknya tidak langsung terganggu dengan masalah yang menjadi alasan bagi kebanyakan penganggur berijazah. Menjawat pekerjaan kolar putih dan gaji lumayan bukanlah matlamat utama yang mengatasi minat dan keinginan berbakti kepada bangsa dan negara.

Mungkin tidak keterlaluan dikatakan bahawa golongan ini adalah golongan pelapis PDRM yang satu hari nanti mampu membawa paradigma baru dengan anjakan luar biasa kepada dunia kepolisan negara ini.

Manakan tidak, dengan pengetahuan yang ada, ditambah lagi dengan amalan kerja yang bermula dari bawah memberi kelebihan yang jelas kepada golongan ini untuk memahami simpang siur bidang ini dan menyita ketirisan yang mungkin wujud sebelum ini.

Keputusan luar biasa ini pastinya lahir daripada individu yang mempunyai kekuatan dalaman yang tinggi. Hakikatnya, bukan mudah untuk seseorang itu mencapai kelulusan akademik tertinggi iaitu PhD.

Malah, ada antara kami golongan akademik sendiri mengakui bahawa PhD adalah seperti frasa 'permanent head damage'! Dengan kepayahan yang diharungi, kesediaan mereka untuk berkhidmat sebagai anggota polis dan bermula dari bawah, amatlah sesuatu yang luar biasa.

Malah, dengan kelulusan sarjana sekalipun belum tentu ada yang sudi menjadi konstabel biasa! Tahniah kepada belia hari ini yang nampaknya semakin matang berfikir dan bijak mengatur hidup.

Jika mat rempit kini ada yang menerima anugerah kerana keberanian membuat terjunan di Kutub Utara, satu hari nanti kita akan berbangga dengan pasukan polis Malaysia yang bukan hanya segak tetapi mampu menjalankan tugas dengan cemerlang hasil integrasi murni teori dan praktik yang seimbang.

Pasukan yang luar biasa, pasti membuahkan hasil yang luar biasa!

SITI SURIANI OTHMAN,
*Pensyarah Program Komunikasi,
Fakulti Kepemimpinan
dan Pengurusan,
Universiti Sains Islam Malaysia
(Usim).*